



Jungi Garde Basler Bebbi Fasnacht 2012

im Dienschd vo dr Majeschdät

Vor 50 Joor duet dr Ian Fleming mental schampar grampfe
und so dr Spion Tscheims Bond us em Boode stampfe.
Dä Held stoht ohni Fähl und Tadel
im Dienschd vo „se Quiiin of England“ und em Adel.




Dr Tscheims Bond bruuchts hütte mehr denn je,
an däne viile schöne Fraue kasch das gseh,
mit sinere Intelligänz und sim Charme het är viil Macht
iberall uf dr ganze Wält wo s gracht!

So wär in Dütschland d Miss Money Penny
(D Merggel Angela) froh drüber, gopferglemmi
Wenn dr Bond, dr Tscheims, nit wohr,
ihre und em Mösiöö Sarkozy`s -
Eurofieber könnt iidämme übers Joor.



Au unseri SVP brucht vom Bond e Quantum Drooscht
Nach dem Riisewahldisaschter, jo bigooscht
Si wurde no guet e witteri Rundi Roulette verdraage
und wurde drotzdäm grauehaft versage.

E ganz e Hufte Liebesgriess us Moskau
schigge dr Putin und Medvedew em Tscheims ganz schlaue
Er soll sofort si Moonraker starte.
Si könne nimme lenger warte.
Dr Bond seit: Dange beschtens, nai!
Är sigi jetzt grad nit dehei.
Är jagi grad dr Doggter No
alias chinesische Minischer Wen Jiabao.



Dr Bond muess nimm nach Lybie go,
dert sinn si jetzt au ohni Tscheims froh,
doch in Syrie bruche si ihn fyr dr Assad, dä Wieschtesohn,
dä het dert d Lizänz zum Töte, s isch e Hohn.

Dr Obama mit sine Goldeneyes us Amerikeit
Wär sehr froh, wenn dr Tscheims Bond hilfsbereit
ihm die verstoggte Republikaner us Wäg kennt driibe,
will är so gärn no lenger Präsident wött bliibe.



Dr Maa mit em goldige Colt, (i main dr Berlusconi),
kasch nit mit em Tscheims vergliche
Är het mit Sagg und Pagg us em Palazzo miesse wiiche.
Giggerig gaiferet är zu sim Alfa use:
Io gange subito con glaini Maiteli go schmuuse.



Dr Tscheims Bond bruuchts iberall uf dere Wält.
Nur ai Verain schaffts us eigener Graft,
das sinn die Junge vo de Bebbi, es isch fabelhaft,
fyr uns haissts klar: „Dr Moorge stirbt nie!“
Mir mache Fasnacht „Vorwärts marsch“! Waisch wie!!

Basler Bebbi Basel

E jede Bueb sött e Bebbi syy!

Drumm schryb dy bi dr Junge Garde yy.
Lehrsch drumme oder pfyffe und mit e bitz Gschigg
griegsch dr ultimativi Fasnachts-Kick.

**Schnupper- und Yschribdaag im Bebbi Käller am Luftgässli 5
Samsdig, 10. Merze, vom eins bis am vieri am Noomidaag
Fir me Informatioone sofort im Oobmaa delifoniere**

Michel Ries, Delifon 079 651 14 26 oder
www.baslerbebbi.ch